

## Mama Mes ta Mihó

Kon muchanan chikitu ta reakshoná pa ku kuido dor di hende fuera di nan mama? Resultadonan di e estudio merikano mas amplio a kaba di sali. *Instituto Nashonal di Salú di Muchanan i Desaroyo Humano di Institutenan Nashonal di Salú* a hasi e estudio di 1100 mucha na dies suidat durante un periodo di dies aña. Nan a studia muchanan ku a risibí kuido di un òf otro famia, yaya, krèsh, skol preparatorio, èts.

Kiko tabata e resultado? **E estudio a konkluí ku tin un relashon fuerte entre e kantidat di tempu ku muchanan ta haña kuido di otro hende (fuera di mama) i komportashon no-deseá manera agreshon, rebeldia, i desobediensia.** Dr. Jay Belsky, e investigadó prinsipal di e estudio, a reportá, “mas tempu e mucha ta haña kuido asina, mas komportashon problemátiko e lo tin. Muchanan ku ta haña kuido di otro hende mas ku trinta ora pa siman, ta mas demandante, ménos komplasiante, i nan ta mas agresivo.” Tambe e muchanan a skor haltu den kategorianan di “krueldat,” “intimidashon,” “gemeenheid,” i “papia demasiado.”

Un konklushon di e estudio ta ku **un mucha ku ta haña kuido di otro hende (na lugá di mama) tin tres bes mas chèns pa komport'é malu na klùterskol ku e mucha ku ta haña kuido prinsipalmente di su mama.** Esaki ta e kaso apesar di e kalidat di kuido ku e mucha ta risibí, apesar di e profeshonalismo di e trahadónan di krèsh, apesar di e moda ekonómiko di e famia.

Tin un relashon natural entre un mama i su yu chikitu. Opservá un beibi. Tata ta un persona spesial p'é; ma e ta “adorá” su mama! **Ora no tin amplio tempu pa e relashon natural ei, rabia ta desaroyá den e yu.** E ta sinti ku algu ta robes, maske e no sa kiko e ta. E amargura ku e ta sinti ta demonstrá despues dor di problemanan ku komportashon.

Tempu ku mi tabata mucha, tabata normal pa muchanan ta na kas ku mama te ora nan a kuminsá klùterskol. Ma hende ta mas sabí awendia! Nos a yega na konklushon ku mester prepará e yu pa klùter. Komo resultado nos a agregá e di dos aña di klùter. Anto nos a haña ku e yunan mester prepará pa klùter. Skol preparatorio tabata e kontesta. I krèsh lo mester prepará e yu pa skol preparatorio. Awor e úniko kos ku ta falta ta pa kuminsá prepará e yunan pa krèsh, promé ku nan ta nase...

Resultado di e estudio aki mester ta sumamente preokupante pa nos. Tantisimo hende na nos islanan ta konvensé ku ta masha normal pa otro hende kuida nan yunan for di kuna te klùter!

Ma warda un ratu! Yu di ken e kriatura ta? E kontesta ta mas kla ku di dia. Si e ta bo yu, abo ta responsabel p'é. **Mama, ningun hende—ni un eksperto—por kuida e yu manera ABO! E yu tin mester di ABO!** No pon'é den man di otro hende, hasiendo daño emoshonal n'é dia tras dia!

Awendia hende ke kos dushi, fásil i suave. Nan ke relashon intimo, nan ke yu, ma nan no ke karga konsekuensia di e desishonnan ei. Pa nan, un yu ta kita muchu tempu i ta eksigí muchu trabou. Ta komo si fuera nan ke yu komo un hòbi...no komo un responsabilidad serio.

Beibel ta muestra ku responsabilidad (sakrifisial, tin bes) ta kompañá hañamentu di yu. Damanan hóben ta instruí “*pa stima nan yunan, pa ta...bon ama di kas...*” (Tito 2:4-5). “*Ama di kas*” ta nifiká literalmente trahadó na kas. Tantu mama ta preferá laga e yu na krèsh na lugá di hasi e sakrifisio nesesarario.

Mi ta komprendé ku tin mama ku ta haña nan obligá pa manda nan yu krèsh; por ehèmpel, e mama soltera. Maske nan por deseá di keda kas ku e yu, no tin moda di hasi. **Ma unda tin un chòis, mamanan mester invertí tempu di kalidat i kantidat ku nan yunan.** No tin supstituto pa e laso entre e mama i yu. Mama mes ta mihó!